

(24/4/2023, HARIAN METRO, PG 3)

Usaha ubah cara hidup gelandangan tak semudah 'ABC'

Kuala Lumpur: Dewan Bandaraya Kuala Lumpur (DBKL) mengakui terdapat segelintir gelandangan yang sebelum ini diselamatkan termasuk ditawarkan pekerjaan kembali menjadi gelandangan semula.

Unit Media Jabatan Perancangan Korporat DBKL berkata, usaha mengubah cara hidup gelandangan ini bukan sesuatu yang mudah memandangkan mereka sudah selesai dengan cara hidup bebas sebelum ini.

"Yang pasti, keinginan untuk mengubah kehidupan dan sikap yang lebih positif adalah tertakluk kepada sikap gelandangan itu sendiri.

"Mereka ini lebih suka hidup berpelesenan di jalan dan menerima sumbangan seperti makanan daripada orang ramai daripada berusaha menjalani cara kehidupan yang normal dengan bekerja mencari pendapatan dan mempunyai tempat tinggal tetap.

270

Bilangan gelandangan diambil bekerja bagi tempoh 2020-2022

"Faktor luaran seperti sikap majikan, sokongan masyarakat sekeliling, keadaan persekitaran dan sebagainya juga memainkan peranan menyebabkan mereka kembali kepada kehidupan asal," katanya dalam satu kenyataan kepada

Harian Metro.

Kenyataan itu berkata, berdasarkan rekod, jumlah keseluruhan gelandangan yang diambil oleh majikan untuk bekerja bagi tempoh tiga tahun adalah seramai 270 orang.

"Bagi 2020, seramai 196 orang gelandangan diambil bekerja oleh majikan, 2021 (47 orang) dan 2022 (27 orang).

"DBKL tiada rekod rasmi berkaitan gelandangan yang ditawarkan pekerjaan atau 'lari' dari majikan ma-

sing-masing," katanya.

Pada masa sama, DBKL turut memaklumkan pihaknya bersama agensi berkaitan seperti Yayasan Kebajikan Negara (YKN) sentiasa berusaha mengadakan program *job matching* bersama majikan yang berminat bagi memastikan kelangsungan hidup gelandangan.

Katanya, kerjasama ini turut membabitkan Pertubuhan Keselamatan Sosial (Perkeso) dan majikan yang dikenal pasti melalui siri

Jom Cari Kerja dengan menawarkan peluang pekerjaan bersesuaian kepada mereka.

"Selain pekerjaan yang ditawarkan majikan, gelandangan yang ditempatkan di Pusat Transformasi Gelandangan Anjung Kelana masih meneruskan aktiviti pertanian (kebun bandar).

"Sehingga kini, terdapat 10 penghuni Anjung Kelana yang mendapat manfaat daripada projek pertanian yang diusahakan oleh DBKL," katanya.